

Dr. Ardis Hanson ta papia diaranson awor riba Salud Mental na Biblioteca

ORANJESTAD (AAN): Biblioteca Nacional di Aruba ta organisa un charla pa comunidad di Aruba en general diaranson awor pa 7.30 di anochi. Ta trata di un charla cu lo wordo duna door di sra. Dr. Ardis Hanson, kende ta un bibliotecario Mericano y a traha como Director di The Louis de la Parte Florida Mental Health Institute Research Library na University of South Florida (USF) for di augustus 1991 pa february 2011.

Den un declaracion cu el a duna, dr. Hanson a splica cu el a cuminsa ta envolvi cu ACURIL na 2004 y ya caba na 2006 el a realisa su prome bishita pa Aruba unda el a sera conoci cu Astrid Britten, directora di BNA, y otro funcionarianan.



Pesey, segun el a bisa, ora cu el a wordo invita pa duna un charla, e no a duda ningun momento. E ta concentra hopi, den su trabou, riba con e servicio di salud mental ta wordo brinda door di sector publico, con ta yega na e politica y con e ta afecta e

servicio cu ta wordo duna. Hopi biaha, e ta bisa, tin e pensamento erroneo cu problemanan di salud mental no ta tratabel, y remedinan ta demasiado caro. E puntonan aki no ta cuadra y el a enfatisa riba e hecho cu salud mental cu wordo trata ta evita cu e pashentnan ta cay bek y cu lo costa estado hopi mas placa. “Solamente si mira con e nocion di malesanan mental a evoluciona den e ultimo dies añanan, e ta progresivamente mas tratabel, y financia door di Estado,” el a splica.

Problema di salud mental tin un variacion di malesa manera zychofrenia, bi-polar disorder, depresion manico, obsessive compulsive disorder y desaroyo di otro malesanan cu edad cu ta cay bou di dementia. Problemanan mental por duna su prome sintomanan cerca mucha, adulto, y sigui riba resto di bida. Hopi biaha e ta cronico pero tambe e por aparece un biaha y desaparece pa no bolbe mas ni afecta e persona di funciona mas.

Dr. Hanson, kende ta trahando como Research Coordinator Dean's Office na University of South Florida (USF), tin un Bachelor of Fine Arts (University of Tampa), un Master of Arts, Library and Information Science (University of South Florida) y recientemente dr. Hanson a gradua como Doctor of Philosophy, Communication (University of South Florida).

Un problema di salud mental ta algo cu por wordo detecta door di un dokter di cas mes, na opinion di dr. Hanson. Pero pa un tratamiento di largo plaso, por referi e persona pa un especialista di e ramo. Na momento cu detecta e malesa, e persona haya su tratamiento, e siguiente fase por ta envolvi trahadonan socialnan cu por guia un pashent asina biba un bida mas normal posibel – bay scol of traha, y haya un luga pa biba.

El a muestra riba e hecho cu problemanan mental no ta malesa cu por wordo detecta cu un test den laboratorio of

door di saca X-Ray manera otro malesanan. Pero tecnologianan di imagen cu tin awendia, manera Brain-Scan (MRI), por mira indicacion di tissuenan di cerebro cu ta desaroya diferente y constata cu tin algo cu no ta cuadra. E ta mas un estudio di analisa con e cerebro ta cambia y funciona. E ta spera cu e forma aki lo por duna miho tratamento pa futuro. “Problema mental no ta algo horibel, e ta mescos cu cualkier otro malesa of problema di salud. Si bo tin’e, bo mester busca tratamento. Sin tratamiento e problema di salud, mescos cu cualkier otro malesa, lo bira pio,” Hanson a splica.

E tema di su charla lo ta: The Notion of Expert and Evidence” pero tambe lo discuti riba “Policy Making”. Esta con ta determina kende ta experto pa papia riba salud mental y ki tipo di evidencia ta uza pa tuma un decision, cu ta wordo uza pa crea e politica (maneho) di Gobierno.

Entrada lo ta gratis y e charla ta pa publico general.